



清刻龍藏佛說法變相圖

解脫道論卷第十

納一

阿羅漢優波底沙造

梁扶南三藏僧伽婆羅譯

五方便品第十一之一

於是初坐禪人樂脫老死樂除生死因樂除
無明闇樂斷愛繩樂得聖慧於五處當起方
便所謂陰方便入方便界方便因緣方便聖
諦方便問云何陰方便答五陰色陰受陰想
陰行陰識陰

問云何色陰答四大四大所造色云何四大
地界水界火界風界云何地界堅性堅相此
謂地界云何水界水濕和合色此謂水界云
何火界火煖熱色此謂火界云何風界風持
色此謂風界初坐禪人以二行取諸蓋以略
以廣如說觀四大如是可知云何四大所造

色眼入耳入鼻入舌入身入色入聲入香入
味入女根男根命根身作口作虛空界色輕
色軟色堪受持色增長色相續色生色老色
無常搏食處色眼色云何眼入以是見色有
對依彼眼識起此謂眼入復次依眼精肉搏
白黑眼珠三圓於肉血風痰唾五重內住如
半芥子大如蟻子頭初業所成四大所造火
大最多此清淨色謂爲眼入如大德舍利弗
所說以眼識清淨見諸色或小或微如牖柯
喻云何耳入以是聞聲於是聲有對依耳識
起此謂耳入復次於二孔赤毛爲邊依膜住
如青豆莖初業所造空大最多四大所造清
淨色此謂耳入云何鼻入以是聞香於是香
有對依鼻識起此謂鼻入復次於鼻孔中三
和合依細孔住如拘毗陀羅形初業所造風

大最多四大所造清淨色此謂鼻入云何舌
入以是知味於是味有對依舌識起此謂舌
入復次於舌肉上兩指大住如鬱波羅花形
初業所造水大最多四大所造清淨色此謂
舌入云何身入以是覺觸於是觸有對依身
識起此謂身入復次除毛髮爪齒所餘不受
於一切受身初業所造地大最多四大所造
清淨色此謂身入是可見色此謂色入是有
對聲是謂聲入是有對香此謂香入是有對
味此謂味入是女性是女根是男性是男根
是隨守護業所成色此謂命根是以身令現
諸行名行此謂身作是以口令現諸行名行
此謂口作是色分別此謂虛空界是色輕性
此謂色輕是色軟性此謂色軟是色堪受持
性此謂色堪受持此三種是身不懈怠性是

諸入聚此謂色聚是色聚此謂色相續是色
令起此謂色生是令色熟此謂色老是色敗
壞所謂色無常以氣味眾衆生得立此謂氣
味搏食色依界及意識界起此謂界處色是
諸界懈怠此謂睡眠色此二十六所造色及
四大成三十色問四大及四大所造色云何
差別答四大依四大共生四大所造色依四
大生四大所造色非四大所依亦非四大所
造色所依如三杖得倚如是四大可知如三
杖影倚如是四大所造色可知此謂差別於
是坐禪人此三十色以五行可知所勝如是
以令起以聚以生以種種以一同云何以令
起答九色業因緣所起所謂眼入耳入鼻入
舌入身入女根男根命根處色二色心因緣
所起所謂身作口作一色時節心所起所謂

聲入四色時心食因緣所起所謂色輕色軟
色堪受持眠色十二色四因緣所起所謂色
入舌入味入虛空界色聚色相續色色生搏
食四界二色無有所起所謂色老色無常復
次生緣老老緣無常如是以令起所勝可知
問云何以聚答九聚業所起九聚心所起六
聚時節所起三聚食所起問云何九聚業所
起答所謂眼十耳十鼻十舌十身十女根十
男根十處十命根九問云何名眼十答眼清
淨四界是其處復依四界色香味觸命根眼
清淨此十法共生不相離此謂聚是謂眼十
此起是生此熟謂老此壞是無常此分別是
虛空界此四法彼聚共起此眼依於十老時
生第二眼十彼二種十聚此謂聚彼隨逐此
謂相續此六法彼共起彼復第二眼十依於

老時生第三眼十是第二及第三眼十此謂聚唯彼法隨逐此謂相續初十散壞第二十老第三十起彼成一刹那如是所起眼十彼聞不可知刹那輕速故不現世間知有彼坐禪人見眼相續如江流如燈焰相續此謂眼十如是耳十鼻十舌十身十女根十男根十命根九以廣可知問云何九聚心所起答清淨八義清淨身作九清淨口作十清淨輕九輕身作十輕口作十一清淨眼九眼身作十眼口作十一問云何名清淨八心所起答四界依界色香味觸此八法共生不相離彼十是名清淨八彼起是生彼熟是老彼壞是無常彼分別是虛空界此四法彼隨起彼清淨八於壞時與第二心共起第二清淨八初清淨壞第二清淨起於一刹那起此非展轉爲

聚以與三所起所聚如是清淨輕九及清淨眼九六作聚非初壞非第二起無一刹那何故不一心二作令起餘如初說問云何六聚時節所起答清淨八清淨聲九清淨輕九輕聲十清淨眼九眼聲十外聚成二清淨八及聲九問云何三聚食所起答清淨八清淨輕九清淨眼九時節食所起聚相續業處相似可知餘如初說命九天聚於欲界於業處所成八聚以壽命活鼻舌身男女根如是輕等三及眠此於色界無有命九聚無想梵天於其身一切入以是得活如是以聚問云何以生答如男女入胎於剎那生三十色起所謂處十身十或女根十或男根十不男不女二十色起所謂處十身十於欲界化生滿根入男女於生剎那七十色起所謂處十身十眼

十耳十鼻十舌十或女根十或男根十或於惡趣化生生盲女人男人於其生剎那六十色起除眼十如是生聾人六十色起除耳十生盲聾人五十色起除眼十耳十惡趣化生滿根入或非男或非女及劫初人於其生剎那六十色起除男女根於彼盲及非男非女五十色起除眼根十除非男非女根或聾非男非女亦五十色起除耳十及非男非女根或盲聾非男非女四十色起處十身十鼻十舌十梵天於其生剎那四十九色起處十眼十耳十身十命根九無想天衆生於其生剎那九色起命根九如是以生可知問云何以種種答一切色成二種所謂大細於是十二色大内外色入以有對義餘十八色細以無對義復二種色所謂内外於是五色成内眼

等五入以有境界義餘二十五外色以無境界義復有二種色命根不命根於是八色名根五内女根男根命根以依義餘二十二非命根以無依義一切色成三種所謂受色非受色有壞色於是九色有受八根及處色以業報所成義九色不受聲入身作口作色輕色軟色堪受持色老色無常及眼非業報所成義餘十二色有壞彼以二種義復有三種色所謂可見有對非可見有對不可見無對於是一色可見有對所謂色入以見義以觸義十一色不可見有對除色入餘大色以不見義以觸義十八色不可見無對餘細色不可見義不可觸義一切色成四種所謂自性色形色相色分別色於是十九自性色餘十二大色女根男根命根水界搏食處色眠色

以畢竟義七形色所謂身作口作色輕色軟色堪受持色受色相續自性色以變三相色色生色老色無常以有爲相義一色分別色所謂虛空界以聚分別義於是自性色彼成分別餘無分別如是以種種分別問云何以一種當分別答一切色非因非無因因不相應有緣有爲世所攝有漏有縛有結有流有軀有蓋所觸有趣有煩惱無記無事非心數心不相應小欲界繫不定非乘不與樂共起不與苦共起不苦不樂共起不令聚非不令聚非學非非學非見所斷非思惟所斷如是以一種所勝可知此謂色陰

問云何受陰答以相一受以彼心受持成一由處二受所謂身受意受由自性三受樂受苦受不苦不樂受由法四受善受不善受報

受事受由根五受樂根苦根喜根憂根捨根由黑白六受有漏樂受無漏樂受有漏苦受無漏苦受有漏不苦不樂受無漏不苦不樂受由門七受從眼觸生受從耳觸生受從鼻觸生受從舌觸生受從身觸生受從意識界觸生受從意識界觸生受以廣成納一一百八受六依愛起受六依出離起受六依愛憂起受六依出離憂起受六依愛捨起受六依出離捨起受此六六成三十六於三時三三十六此謂受陰

問云何想陰答以想一相以心知事以黑白二想謂顛倒想不顛倒想以由不善三想謂欲想瞋恚想害想以由善三想謂出離想不瞋恚想不害想以不知義性處門四想謂不淨淨想於苦樂想於無常常想於無我我想

以由知義性處四想不淨想苦想無常想無
我想以由毗尼五想於不淨淨想於不淨不
淨想於淨不淨想於淨淨想疑想以由事六
想色想聲想香想味想觸想法想以由門七
想從眼觸生想從耳觸生想從鼻觸生想從
舌觸生想從身觸生想從意界觸生想從意
識界觸生想如是種種想可知此謂想陰
問云何行陰答觸思覺觀喜心精進念定慧
命根蓋不貪不瞋慙猗欲解脫捨作意貪
瞋恚無明慢見調戲疑懈怠無慙無愧除受
想一切心數法行陰於是觸者是心觸事如
日光觸壁是其想足處思者是心動如作宅
種地是其事門足處覺者是心行如以心誦
經是其想足處觀者是心觀事如隨思義是
其覺足處喜者是心歡喜如人得物是其踊

躍足處心者是心清如呪令水清彼四須陀
洹分足處精進者是心勇猛如壯牛堪重彼
八事處足處念者是心守護如持油鉢彼四
念處足處定者是心專一如殿裏燈彼四禪
足處慧者是心見如人有眼彼四聖諦足處
命根者是無色法^{第一}是壽命如鬱波羅水彼名
色足處蓋者是心惡止離如人樂命離毒彼
四禪行足處不貪者是心捨著如得脫責彼
離出足處不瞋者是心不瞋怒如猫皮彼四
無量足處慙者是心羞恥於作惡如憎惡屎
尿彼自身依足處愧者是心畏於作惡如畏
官長彼世依足處猗者是心動搖滅如憂熱
人冷水洗浴彼喜足處欲者樂作善如有信
檀越彼四如意足處解脫者是心屈曲如水
流深處彼覺觀足處捨者是心不去來如人

執稱彼精進等足處作意者是心令起法則
如人執柁彼善不善足處貪者是心攝受如
鵝鳥彼可愛可樂色足處瞋恚者是心踊躍
如瞋恚蛇彼十瞋恚處足處無明者是心無
所見如盲人彼四顛倒足處慢者是心舉如
共相撲彼三種足處見者是心取執如盲人
摸象彼從他聞聲不正憶足處調者是心不
寂寂猶如沸水彼速精進足處悔者是心退
如愛不淨彼以作惡善退足處疑者是心不
一取執如人行遠國惑於二道彼不正作意
足處懈怠者是心懶惰如蛇藏蟄彼八懶處
足處無慙者是心於作惡無羞耻如梅陀羅
人彼不恭敬足處無愧者是心於作惡無畏
如惡王彼六不恭敬足處此謂行陰
問云何識陰答眼識耳識鼻識舌識身識意

界意識界於是眼識者依眼綠色生識是謂
眼識耳識者依耳緣聲生識是謂耳識鼻識
者依鼻緣香生識是謂鼻識舌識者依舌緣
味生識是謂舌識身識者依身緣觸生識是
謂身識意識界者依處五事依二事五識若前
後次第生識此謂意識界者除此六識
餘心此謂意識界此七識以三行所勝可知
如是以處事以事以法問云何以處事答五
識種種處種種事意識界及意識界一處意界
五事意識界六事五識者內法內處外事意
界內法外處外事意識界內法外處內事亦
外事六識者初生處初生事意識界於入體
剎那共生處初以生處於無色有無處一切
事如是以處事可知問云何以事答五識一
一受其境界非一一次第生不前不後生不

散起以五識不知所有法除初起以意識不知所有法除意轉以六識不安威儀以迅速安之以六識不受持身業口業以六識不受善不善法以迅速受之以六識不入定不安詳起以迅速入定以後分安詳以六識不終不生或以後分或以彼事終以果報意識界生以六識不眠不覺不見夢以後分眠以轉意覺以迅速夢見如是以事可知問云何以法答五識有覺有觀意識界有覺有觀意識界設有覺有觀設無覺少觀設無覺無觀五識與捨共行身識^{納一}設與樂共行設苦與苦共行意識界設與喜共行設與憂共行設與捨共行五識果報意識界設果報設方便意識界設善設不善設果報設方便六識無因無起世間法有漏有結有縛有流有厄有蓋所觸有

取有煩惱不以見所斷不以思惟所斷非爲聚非非爲聚非學非非學少欲界繫不定非乘意識界一切壞如是以法勝可知此謂識陰此謂五陰

復次此五陰以四行所勝可知如是以句義以相以分別以攝問云何以句義答色者現義受者可受義想者知義行者作義識者解義陰者種類集義如是以句義可知問云何以想答色者自色相如見刺彼四大足處受者彼受相如癩惡病彼觸足處想者持相爲相如作像貌彼觸足處行者和合爲相如轉輪彼觸足處識者識知相如知味彼名色足處如是以相可知問云何以分別答三種陰分別五陰五受陰五法陰於是五陰者一切有爲法五受陰者一切有漏法五法陰者戒

陰定陰慧陰解脫陰解脫知見陰於此五受陰是可樂如是以分別可知問云何以攝答三種攝入攝界攝諦攝於是色陰十一入所攝三陰法入所攝識陰意入所攝色陰十一界所攝三陰法界所攝識陰七界所攝戒陰定陰慧陰解脫知見陰法入及法界所攝解脫陰法入及意入及法界意識界所攝五陰或諦所攝或非諦所攝五受陰苦諦及習諦所攝戒陰定陰慧陰道諦所攝解脫陰非諦所攝解脫知見陰苦諦所攝有法是陰所攝非諦所攝有法是諦所攝非陰所攝有法是非諦所攝亦諦所攝有法非陰所攝亦非諦所攝於是非根所縛色及與道相應沙門果是陰所攝非諦所攝泥洹是諦所攝非陰所攝三諦是陰所攝亦諦所攝制者非陰所攝亦

非諦所攝如是以行於陰知分別方便此謂陰方便已竟

問云何入方便答十二入眼入色入耳入聲入鼻入香入舌入味入身入觸入意入法入於是眼入者是界清淨以是見色色入者界色形模是眼境界耳入者是界清淨以是聞聲聲入者是界鳴耳境界鼻入者是界清淨以是嗅香香入者界香鼻境界舌入者是界清淨以是知味味入者是界氣味舌境界身入者是界清淨以是觸細滑觸入者是地界火界風界堅軟冷暖身境界意入者是七識界法入者是三無色陰及十八細色及泥洹此謂十二入復次此十二入以五行所勝可知如是以句義以境界以緣以彼夾勝心起以攝問云何以句義答眼者見義色者現義

耳者聞義聲者鳴義鼻者嗅義香者芳義舌者嘗義味者氣味爲義身者正持義觸者可觸義意者知義法者無命義入者無色法門義處義受持義如是以句義可知問云何以境界答眼耳不至境界鼻舌身至境界意俱境界復有說耳者至境界何故唯有近障不聞聲如說呪術復說眼者於其自境界至境界何故壁外不見如是以境界可知問云何以緣答緣眼色光作意生眼識於是眼者爲眼識以四緣成緣初生依根有緣色者以三緣成緣初生事有緣光者以三緣成緣初生依有緣作意者以二緣成緣次第非有緣緣耳聲空作意得生耳識以此分別當分別緣鼻香風作意得生鼻識緣舌味水作意得生舌識緣身觸作意得生身識緣意法解脫作

意得生意識於是意者是後分心法者是法事此成四種六內入過去現在未來第一種五外入過去未來現在離除非入根是第二種法入第三種十一種制名者所謂衆生方時犯罪頭陀一切相無所有入定事滅禪定實思惟不實思惟是第四種此謂法事專心者心隨如理作意者於意門轉意識者速心於是意者爲意識以依緣成緣法者以事緣成緣解脫者以依緣成緣作意者以二緣成緣次第緣有緣如是以緣可知問云何以夾勝心起於眼門成三種除夾上中下於是上事以夾成七心無間生阿毗地獄從有分心轉見心所受心分別心令起心速心彼事心於是有分心者是於此有根心如牽縷轉心者於眼門色事夾緣故以緣展轉諸界依處

有分心成起有分心次第彼爲見色事成轉生轉心轉心次第依眼應轉現得見生見心見心次第已見以心現受生受心受心次第以受義現分別生分別心分別心次第以分別義現今起生令起心令起心次第以令起義由業心速行速行心次第以速行義不以便生彼事果報心從彼更度有分心問何譬喻答如王殿上閉城門卧瘞女摩王足夫人坐大臣及直閤列在王前聾人守門依城門住時守園人取菴羅果打門王聞聲覺王勅瘞女汝當開門瘞女即奉命以相貌語聾人言聾人解意即開城門見菴羅果王捉刀女受果將入現於大臣大臣授與夫人夫人洗淨或熟或生各安一處然後奉王王得食之食已即說彼功德非功德還復更眠如是

如王卧如有分心可知如守園人取菴羅果打門如是於眼門色事夾可知如王聞彼聲王覺教瘞女開門如是以緣展轉界依處有分心起可知如瘞女以相貌教聾人開門如是轉心可知如聾人開門見菴羅果如是眼識可知如捉刀女受彼果將現大臣如是受持心可知如大臣取果授與夫人如是分別心可知如夫人洗淨或熟或生各安一處然後與王如是令起心可知如王食彼果如是速心可知如王食已說彼功德非功德利如是彼事果報心可知如王更眠如有分心度可知於是眼門以中事夾速心無間度彼有心以夾下事令起心無間度有分心如是餘於門可知於意門無事夾以作意緣以解脫行於意門成取事於是於上事三心生有

分心轉心速心彼事心於中及下事二心生轉心及速心於是可受不可受中事以種種緣種種受可知以正作意非正作意緣種種善不善可知如是彼夾勝心起可知問云何以攝答三種攝陰攝界攝諦攝於是十入色

陰所攝意入識陰所攝法入餘泥洹四陰所攝十一入十一界所攝意入七界所攝五內入苦諦所攝五外入或苦諦所攝或非苦諦所攝意入或苦諦所攝或非苦諦所攝法入或四諦所攝或非苦諦所攝如是所攝可知

納一

十五

如是以此行於入智令起方便此謂入方便

入方便已竟

問云何界方便答十八界眼界色界眼識界耳界聲界耳識界鼻界香界鼻識界舌界味界舌識界身界觸界身識界意界法界意識

界於是眼清淨眼界色形色界眼識眼識界如是餘可知於五門轉事意界受果報意界唯法入餘法界六識界餘心意識界餘如入廣說於是十界色陰所攝法界餘泥洹四陰所攝七界識陰所攝十一界十一入所攝七界意入所攝十一界苦諦所攝五界或苦諦所攝或非諦所攝法界四諦所攝或非諦所攝意識界或苦諦所攝或非諦所攝問云何說化境界答唯此法陰入界爲境界諸說法種類和合相爲陰說門相爲入說自性相爲界復次世尊爲利根人以陰門說苦諦爲中根人以入門說苦諦爲鈍根人以界門說苦諦復次於名著相人以略說色以分別名說陰爲著色相人以分別色以略說名說入於名色著相人以名色分別說界復次說自性

處說陰說處事說入以處事說心起說界以如是等行界分別方便此謂界方便界方便已竟

問云何因緣方便答無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱

如是皆苦陰起唯以無明滅則行滅以行滅則識滅以識滅則名色滅以名色滅則六入滅以六入滅則觸滅以觸滅則受滅以受滅則愛滅以愛滅則取滅以取滅則有滅以有滅則生滅以生滅則老死憂悲苦惱滅如是

納一

十六

苦陰皆成滅於是無明者不知四諦行者身口意業識者入胎一念心名識名色者共相續心起心數法及迦羅邏色六入者六內入觸者六觸身受者六受身愛者六愛身取者四取有者是業能起欲色無色有生者於有

陰起老者陰熟死者陰散壞問何故無明緣行何故生緣老死答於此無聞凡夫於四諦不知故五受陰長夜樂著我物成彼所觸此我物此我身如是有樂著樂和合爲有思惟彼思惟使非智所處爲得有成住於有如種在耕熟田無彼識爲有滅此謂無明緣行皮無明所起行思入有著於有相事成爲聚於轉有起相續識於有隨心非斷是故行緣識如除日無光明住地增長如是除識無名色於無體住增長如荻相倚展轉相依是故識緣名色依處餘名共生起意入增長依名命四大及食時緣餘五入起增長非餘此緣是故名色緣六入餘根境界識和合起觸是故六入緣觸以觸受或苦或樂或不苦不樂非所觸是故觸緣受癡凡夫受樂成著復更覓

納一

十七

受苦彼對治覓樂若受不苦不樂受捨是故
受緣愛以渴愛急取愛處是故愛緣取彼有
取作事爲有種是故取緣有以如業所勝生
於諸趣是故有生以生成老死是故生緣老
死如穀爲種緣如是無明緣行可知如種爲
芽緣如是行緣識可知如芽爲葉緣如是識
緣名色可知如葉爲枝緣如是名色緣六入
可知如枝爲樹緣如是六入緣觸可知如樹
爲花緣如是觸緣受可知如花爲汁緣如是
受緣愛可知如汁爲米緣如是愛緣取可知
如米爲種緣如是取緣有可知如種爲芽緣
有如是緣生可知如是起種相續如是前際
不可知後際亦不可知如是生無明爲初因
緣相續其前際不可知後際亦不可知問無
明何緣答唯無明爲無明緣使爲纏緣纏爲

使緣初爲初後爲後復次一切諸煩惱成無
明緣如佛所說從漏集起無明集復次如一
心法以眼見色癡人起愛於此時淨樂者心
癡此謂無明思著是無明緣行心著此行緣
識知相應心數法及彼所造色是識緣名色
從愛生喜緣喜故喜色緣故諸根清淨是名
色緣六入無明觸是六入緣觸喜觸緣受欲
受緣愛以著取淨樂是愛緣取以著思是取
緣有彼法起是有緣生住已是老念散壞是
死如是於一剎那成十二因緣問彼十二因
緣分幾名煩惱幾名業幾果報幾過去幾未
來幾現在幾因緣幾已起云何因緣云何因
緣法此二何差別何因緣深性答三煩惱無
明愛取二業行有餘七果報於是名煩惱者
成因爲有後生如畫師色其事不自生如畫

納一

十八

師色事煩惱令起有緣得生如種種色二過去無明及行二未來生老死餘八現在如是以取三時無始生死相續可知十二分因緣者不應說除十二因緣亦不應說爾時云何因緣此十二法如次第展轉因故此謂因緣起十二因緣分已起法此二何差別者因緣者諸行異非成就不可說或有爲或無爲不應說以起因緣法行已成就有爲此二法差別何因緣深性者以是行以是相成無明行緣彼行彼相彼性彼聖人不他緣以慧眼通達如是一切此謂因緣深性復次此因緣以七行可知如是以三節以四略以二十行以輪以牽以分別以相攝云何以三節諸行及識其間第一節受及愛彼間第二節有及生彼間第三節於過去以業煩惱緣現在果報

是第一節以現在果報緣現在煩惱第二節以現在煩惱緣未來果報第三節第一及第三因果節及有節第二節果因節非有節有節者何義答終無間未度陰入界以初業煩惱緣故於諸趣更有生此謂有生節問云何成答彼入無明愛相應以造功德惡業凡夫彼於此時謂死以死受苦卧置死人處不見此世不見彼世失念不得念是時受生苦意念智成退身勇猛成退諸根漸漸失從身或上或下命根失燥失如多羅葉燥於此時如眠夢以業四法起業業相趣趣相云何業是其所造或功德或非功德或重或輕或多或少如近其初所造彼業即起業相者彼處所依造業彼處即起業伴侶業相起彼於時或如現作業趣者以功德緣善趣起以非功德

緣惡趣起名趣相者入胎時三事和合得生
化生者依處處生是其所生處起或宮殿或
坐處或山或樹或江隨其趣及共取相起彼
於此時往彼或倚或坐或卧見彼或取彼於
此時初所造業及業相或趣及趣相作事以
速心現起或命終去速心無間共命根滅成
命終心無間次第以速心起唯彼業或彼業
相或起或取相作事果報心處度於後有如
燈然燈如從火珠出火彼節心起故如伴侶
於母腹依父母不淨三十色業所成起處
身有十彼於老刹那無心過節四十六色成
起業所造三十食節所成二色及八無心過
節色於老刹那共第二心五十四色成起業
所成三十食時所成三色及八如是起識緣
名色名色緣識如是成有節於是以三節可

知問云何以四略答無明行於過去業煩惱
略識名色六入觸受於現在果報略愛取有
於現在業煩惱略生老死於未來果報略如
是以四略可知

問云何以二十行答以取無明過去愛及取
以煩惱相成所取以取行過去有以業相成
所取以取識名色六入觸受現在以果報相
生及老死成所取以取愛取現在以煩惱相
成所取以取有現在行以業相成所取以取
生老死未來識名色六入觸受成所取此二
十四法以取其成就成二十如阿毗曇所說
於初業有癡是無明聚是行著是愛覓是取
思是有此五法於此生有初所作業是其緣
不了諸入癡是無明聚是行著是愛覓是取
思是有此五法於此業有爲未來生時緣未

來生時識度是名色清淨是入所觸是觸取
是受此二法於未來生有於此所作業是其
緣如是以二十行可知云何以輪無明緣行
行緣識乃至生緣老死如是皆苦陰起於此
皆苦陰無知此謂無明無明緣行者復如是
以輪可知云何以牽二牽所謂無明所初及
老死所初於是

問云何無明所初答是說次第云何老死所
初是度次第復次無明所初是有邊際面未
來知道老死所初者初邊際面過去知道如
是以牽可知問云何以分別答二種因緣世
間因緣及出世因緣於是無明所初是世因
緣

問云何出世因緣答苦依苦信依信喜依喜
踊躍依踊躍猗依猗樂依樂定依定如實知

見依如實知見獸患依獸患無欲依無欲解
脫依解脫滅智此謂出世因緣復說四種因
緣業煩惱爲因種爲因有作共業爲因問云
何業煩惱爲因答無明所初云何種爲因如
種芽相續云何有作如化色云何共業爲因
如地雪山海日月復有說非此共業因是諸
色心法時節爲因無有共業如世尊說偈
業不與他共 是藏他不偷 人所作功德
其自得善報
如是分別可知問云何以相攝答四種相攝
陰相攝入相攝界相攝諦相攝於是無明行
觸愛取有行陰所攝識識陰所攝名色四陰
所攝六入二陰所攝受受陰所攝生老死色
陰所攝及行陰所攝無明行觸受愛取有生
老死法入所攝識意入所攝名色五內入所

攝六入六內入所攝無明行觸受愛取有生
老死法界所攝識意識界所攝名色五界所
攝六入十二諦所攝無明愛取十諦所攝餘
九苦諦所攝出世因緣道分道諦所攝因緣
滅滅諦所攝如是以相攝可知如是以行因
緣方便可知此謂因緣方便因緣方便已竟

解脫道論卷第十

音釋

納一

手三

盲瞽盲莫耕切目無童子也 撲撲邪射切 蟄蟄直立切 癩癩落蓋切 模模莫明切 𦵏𦵏許救切
氣夾古洽切 痲痲鳥下切 燥燥蘇到切
也